



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PERANGKAAN PEMBUATAN BULANAN, MALAYSIA MEI 2025

Jualan sektor Pembuatan meningkat 2.4 peratus, berjumlah RM158.7 bilion pada Mei 2025

PUTRAJAYA, 11 Julai 2025 - Nilai jualan sektor Pembuatan meningkat 2.4 peratus (April 2025: 4.7%), berjumlah RM158.7 bilion pada Mei 2025. Jabatan Perangkaan Malaysia (DOSM) melaporkan dalam keluaran **Perangkaan Pembuatan Bulanan, Malaysia, Mei 2025** pada hari ini.

Mengulas prestasi jualan Pembuatan terkini, Dato' Sri Dr. Mohd Uzir Mahidin, Ketua Perangkawan Malaysia berkata, "Peningkatan nilai jualan dalam sektor Pembuatan disumbangkan terutamanya oleh subsektor Makanan, minuman & tembakau, kekal pengembangan yang kukuh dengan peningkatan 13.0 peratus pada Mei 2025 (April 2025: 10.8%). Pertumbuhan ini juga disokong oleh subsektor Peralatan elektrik & elektronik dan Produk mineral bukan logam, logam asas & produk logam, yang masing-masing meningkat sebanyak 5.0 peratus (April 2025: 9.6%) dan 3.7 peratus (April 2025: 4.6%). Walaubagaimana pun, nilai jualan menurun sebanyak 1.1 peratus kepada RM158.7 bilion berbanding RM160.4 bilion yang direkodkan pada bulan sebelumnya."

Pertumbuhan nilai jualan bagi industri berorientasikan eksport yang mewakili 71.1 peratus daripada jumlah jualan, tumbuh 2.7 peratus pada Mei 2025 (April 2025: 5.1%). Pengembangan ini disebabkan terutamanya oleh peningkatan dalam Pembuatan minyak & lemak daripada sayuran & haiwan sebanyak 15.9 peratus (April 2025: 12.2%). Sementara itu, Pembuatan komputer, produk elektronik & optikal terus meningkat sebanyak 4.9 peratus (April 2025: 10.2%), dan Pembuatan jentera dan peralatan t.t.t.l. meningkat sebanyak 7.7 peratus (April 2025: 9.5%). Perbandingan bulan ke bulan, industri berorientasikan eksport melonjak kepada 0.1 peratus (April 2025: -3.3%).

Begitu juga, industri berorientasikan domestik berkembang sebanyak 1.9 peratus pada Mei 2025, selepas peningkatan 3.6 peratus pada April 2025. Prestasi ini disokong oleh pertumbuhan kukuh dalam Pembuatan produk pemprosesan makanan pada 10.5 peratus pada Mei 2025 (April 2025: 10.0%); serta dalam industri Pembuatan logam asas (4.3%); dan Pembuatan produk logam kecuali mesin & kelengkapan (3.5%). Bagi perbandingan bulan ke bulan, industri berorientasikan domestik susut 3.9 peratus.

Mengulas mengenai bilangan pekerja, Ketua Perangkawan menyatakan, “Sejumlah 2.40 juta orang pekerja direkodkan dalam sektor ini pada Mei 2025, bertambah sebanyak 0.9 peratus (April 2025: 1.2%). Pertambahan ini dipacu terutamanya oleh subsektor Makanan, minuman & tembakau (1.8%); Produk mineral bukan logam, logam asas & produk logam yang direka (1.4%); dan Peralatan elektrik & elektronik (1.1%). Perbandingan bulan ke bulan, bilangan pekerja dalam sektor ini menurun sedikit sebanyak 0.1 peratus.

Pada masa yang sama, gaji & upah yang dibayar dalam sektor Pembuatan juga mencatatkan peningkatan 1.6 peratus (April 2025: 2.4%), berjumlah RM8.3 bilion pada Mei 2025. Selain itu, gaji & upah yang dibayar bertambah baik sebanyak 0.2 peratus berbanding RM8.3 bilion yang direkodkan pada bulan sebelumnya. Selanjutnya, nilai jualan bagi setiap pekerja mencatatkan RM66,163 (1.6%), manakala purata gaji & upah bagi setiap pekerja adalah RM3,470, meningkat 0.7 peratus tahun ke tahun.”

Dalam tempoh lima bulan pertama tahun ini (Januari – Mei 2025), nilai jualan sektor Pembuatan berjumlah RM794.7 bilion, meningkat 3.8 peratus berbanding tempoh yang sama 2024 (Januari – Mei 2024: 3.3%). Bilangan pekerja meningkat sebanyak 0.9 peratus kepada 2.40 juta orang, manakala gaji & upah meningkat 1.9 peratus kepada RM41.9 bilion dengan nilai jualan setiap pekerja berjumlah RM331,327, meningkat 2.9 peratus.


Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah berjaya menduduki kedudukan teratas di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.


Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


**Carta 1: Nilai Jualan Sektor Pembuatan, Malaysia
Mei 2024 - Mei 2025**




Carta 2: Pertumbuhan Jualan Subsektor Pembuatan, Malaysia, April dan Mei 2025



Carta 3: Nilai Jualan Industri Berorientasikan Eksport dan Domestik bagi Sektor Pembuatan, Malaysia, Mei 2024 – Mei 2025



Carta 4: Pembuatan Berorientasikan Eksport dan Domestik Mengikut Kumpulan, April dan Mei 2025



Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAWAN MALAYSIA
11 JULAI 2025